



雅音會編卷之三

長樂縣
振錄西

羊城康麟文瑞集次

後學剡溪王鈍校正

上平聲

五微

五言絕句

正音

山中送別

王維

山中相送罷日暮掩柴扉
春草年年綠王孫歸不歸

玉臺體

權德輿

昨夜裙帶解今朝蟾子飛鉛華不可棄莫是豪砧歸

惜花

張藉

山中春已晚處處見花稀明日來無盡林間宿不歸

湖南曲

崔國輔

湖南送君去湖北送君歸湖裏鴛鴦鳥雙雙他自飛

江南行

三首其二

崔顥

沙渚多風浪蓮船漸覺稀那能不相待獨自逆潮歸

遺響

送友之京

孟浩然

君登青雲去予望青山歸雲山從此別淚濕薜蘿衣

思歸樂

張祐

萬里春歸盡三江鴈亦稀連天漢水廣孤客未言歸

塞下曲

許渾

夜戰桑乾北秦兵半不歸朝來有鄉信猶自寄征衣

悼傷後赴東蜀辟至散關遇雪

李商隱

劍外從軍遠無家與寄衣散關三尺雪回首舊鴛鴦

送兄

七歲女子

別路雲初起，離亭葉正飛。所嗟人異鴈，不作一行歸。

正聲

山中

王勃

長江悲已滯，萬里念將歸。况属高風晚，山山黃葉飛。

南行別弟

二首 其一

常承慶

萬里人南去，三春鴈北飛。不知何歲月，得與爾同歸。

自君之出矣

張九齡

自君之出矣，不復理殘機。思君如滿月，夜夜減清輝。

西樓

常應物

高閣一長望，故園何日歸。烟塵擁函谷，秋鴈過來稀。

題崔逸人山亭

錢起

藥徑深紅蘚，山窓滿翠微。羨君花下醉，蝴蝶夢中飛。

江行

七首 其一

江流何渺渺，懷古獨依依。漁父非賢者，蘆中但有磯。

荊州歌

劉禹錫

渚宮楊柳暗，麥城野雉飛。可憐踏青伴，乘暖著輕衣。

李集

秋浦歌共五首

秋浦錦駝鳥人間天上稀山鷄羞綠水不敢照毛衣

陪侍郎叔遊洞庭醉後其二

船上齊橈樂湖心泛月歸白鷗閑不去爭拂酒筵飛

奔亡道中其二

亭伯去安在李陵降未歸愁容變海色短服改胡衣

醉題王漢陽廳

我似鷓鴣鳥南遷懶北飛時尋漢陽令取醉月中歸

自遣

對酒不覺暝落花盈我衣醉起步溪月鳥還人亦稀

初出金門尋王侍御不遇詠壁上鸚鵡

落羽辭金殿孤鳴唳繡衣能言終見棄還向隴西飛

秋浦歌共十首

淶水淨素月月明白鷺飛即聽採菱女一道夜歌歸

巴女詞

巴水急如箭巴船去若飛十月三千里即行幾歲歸

杜集

復愁共十二首

釣艇收縉盡昏鴉接翅稀月生初學扇雲細不成衣
又其四

身覺省即在家貧農事歸年深荒草徑老恐失柴扉
五言律詩

始音

送盧主簿

王勃

窮途非所恨虛室自相依城闕居年滿琴樽俗事稀
開襟方未已分袂忽相違東岩富松竹歲暮幸同歸

折楊柳

盧照隣

倡樓啓曙扉楊柳正依依鶯啼知歲隔條變識春歸
露葉凝愁黛風花落舞衣攀折將安寄軍中音信稀

昭君怨

合殿恩中絕交河使漸稀肝腸隨玉輦形影向金微
漢地草應綠胡庭沙正飛願逐三秋鴈年年一度歸

秋露

駱賓王

玉闕涼氣早金塘秋氣歸泛掌光逾靜添花滴尚微
變霜凝曉液承月委圓輝別有吳臺上應濕楚臣衣

正音

送友人南歸

王維

萬里春應盡三江鴈亦稀
連天漢水廣孤客郢城歸
卽國稻苗秀楚人菰米肥
懸知倚門望遙識老萊衣

漢陽即事

儲光羲

楚國千里遠孰知方寸違
春遊懽有客夕寢賦無衣
江水帶冰綠莢花隨雨飛
九歌有深意捐珮乃言歸

至七里灘作

李嘉祐

遷客投干越臨江淚滿衣
獨隨流水遠轉覺故人稀
萬木迎秋序千峯駐晚暉
行舟猶未已惆悵暮潮歸

餘干旅舍

劉長卿

搖落暮天迥青楓霜葉稀
孤城向水閉獨鳥背人飛
渡口月初上隣家漁未歸
鄉心正欲絕何處搗寒衣

送榆次林明府

韋應物

無嗟千里遠亦是宰王畿
策馬雨中去逢人關外稀
邑傳榆石在路繞晉山微
別思方蕭索新秋一葉飛

望行人

張籍

秋風窻下起旅鴈向南飛
日日出門望家家行客歸
無因見邊使空待寄寒衣
獨倚青樓暮煙深鳥雀稀

薊北春懷

渺渺水雲外別來音信稀因逢過江使却寄在家衣
問路更愁遠逢人空說歸今朝薊城北又見塞鴻飛
夜到漁家

漁家在江口潮水入柴扉行客欲投宿主人猶未歸
竹深村路遠月出釣船稀遙見尋沙岸春風動草衣

山居即事

王維

寂寞掩柴扉蒼茫對夕暉鶴巢松樹遍人訪華門稀
嫩竹含新粉紅蓮落故衣渡頭燈火起處處採蓮歸

三體

岳陽晚景

張均

晚景寒鴉集秋風旅雁歸水光浮日出霞彩映江飛
洲白蘆花吐園红柿葉稀長沙卑暑地九月未成衣

山行

殷遙

寂歷青山曉山行趣不稀野花成子落江燕引雛飛
暗草薰苔徑晴楊拂石磯俗人猶語此予亦轉忘歸

客中

于武陵

楚人歌竹枝游子淚沾衣異國久為客寒宵頻夢歸

一封書未返千樹葉皆飛南過洞庭水更應消息稀

杭州郡齋南亭

姚合

符印懸腰下東山不得歸獨行南北近漸老往還稀
迸筭侵窓長驚蟬出樹飛田田池上葉長是使君衣

送友人下第歸覲

劉得仁

君此卜行日高堂應夢歸莫將和氏淚滴着老萊衣
嶽雨連河細田禽出麥飛到家調膳後吟好送斜暉

友人南遊不還

于武陵

想思春樹綠千里各依依鄆杜月頻滿瀟湘人未歸

桂花風半落煙草蝶雙飛一別無消息水南蹤跡稀

春日卧病書懷

劉商

楚客經年病孤舟人事稀晚晴江柳變春暮塞鴻歸
今日方知命前年自覺非不能憂歲計無限故山薇

常處士山居

許渾

斲藥去還歸家人半掩扉山風藤子落溪雨豆花肥
寺遠僧來少橋危客過稀不聞砧杵動應解製荷衣

送從弟歸河朔

李嘉祐

故鄉何可到令弟獨能歸諸將旌旄節何人重布衣

空城流水在荒澤舊村稀秋日平原路蟲鳴桑葉飛
寄形逸人 鄭常

羨君無外事日與世情違地僻人難到溪深鳥自飛
儒衣荷葉老野飯藥苗肥若問湖邊意而今憶共歸
秋夜宿僧院 劉得仁

禪寂無塵地焚香話所歸樹搖幽鳥夢螢入定僧衣
破月斜天半高河下露微翻令嫌白日動即與心違
正聲

寄左省杜拾遺

岑參

聯步趨丹陛分曹限紫微曉隨天仗入暮惹御香歸
白髮悲花落青雲羨鳥飛聖朝無闕事自覺諫書稀
送李給事歸徐州覲省 孫逖

列位登青瑣還鄉服彩衣共言晨省日便是晝遊歸
春水經梁宋晴山入海沂莫愁東路遠四牡正駢駢
奉和梁王宴罷龍泓應教 宋之問

水府淪幽壑星輶下紫微鳥驚司僕馭花落侍臣衣
芳樹搖春晚晴雲繞座飛淮王正留客不醉莫言歸
緱山廟

王子賓仙去飄飄笙鶴飛徒聞滄海變不見白雲歸
天路何期遠人間此會稀空歌日云暮霜月漸微微

送真山人歸山

司空曙

得道雲林下年深蹇一歸出山逢世亂乞食覺人稀
半偈初傳法中峯又掩扉愛離應不染塵俗自依依
送元倉曹歸廣陵

韋應物

官閑得去住告别戀音徽舊國應無業他鄉到是歸
楚山明月滿淮甸夜鐘微何處孤舟泊遙遙心曲違

類編

嵩山頌

宋之問

翼翼高旌轉鏘鏘鳳輦飛塵消清蹕路雲濕從臣衣
白羽搖丹壑天營通翠微芳聲耀千古四海儼宸威
駕出長安

聖德超千古皇風扇九圍天迴萬象出駕動六龍飛
淑氣來黃道祥光覆紫微太平多扈從文物有光輝

早朝

耿漳

鐘鼓餘聲裏千官向紫微
宵寒人語少乘月燭來稀
清漏聞馳道輕霞映瑣闈
猶看嘶馬處未啓掖垣扉

送趙評事攝御史監軍嶺南 孫逖

議獄持邦典臨戎假憲威風從閭闔去霜入洞庭飛
篁竹迎金鼓樓船引繡衣明年降真月南斗使星稀
送裴判官自賊中再歸河南幕府

岑參

東郊未解圍忠義似君稀誤落胡塵裏能持漢節歸
卷簾山對酒上馬雪沾衣却向嫫姚幕翩翩去若飛
送李秀才歸江南 韓翃

過淮芳草歇千里又東歸野水吳山出家林越鳥飛

荷香隨去掉梅雨點征衣無數蒼江客如君違者稀
送韓揆之江西 李季蘭

相看指楊柳別恨轉依依萬里西江水孤舟何處歸
湓城潮不到夏口信應稀唯有衡陽鴈年年來去飛

次蔡陽館

孟浩然

日暮馬行疾城荒人住稀聽歌疑近楚投館忽如歸
魯堰田疇廣章陵氣色微明朝拜家慶須著老萊衣
北歸次秋浦界清溪館 劉長卿

萬嶺猿頻斷孤村客暫依鴈過彭蠡暮人向死陵稀

舊路青山在餘生白首歸漸知行近北不見鷓鴣飛
山中古祠
張籍

春草空山暮荒林鳥雀飛記年碑石在經亂祭人稀
野鼠緣朱帳陰塵蓋盡衣近門潭水黑時見宿龍歸
宿龍興寺
綦毋潛

香刹夜忘歸風清古殿扉燈明方丈室珠繫比丘衣
白月傳心靜青蓮喻法微天花落不盡處處鳥啣飛
遊少華山甘露寺
張喬

少華中峯寺高秋衆景歸地連秦塞起河隔晉山微
晚木蟬相應涼天鴈並飛殷勤紀崖石只恐再來稀
贈朗公
耿滌

來自西天竺持經捧紫微年深梵語變行苦俗流歸
月上安禪久苔生出院稀梁間有馴鴿不去為忘機
李集

送白利從金吾董將軍西征
西羌延國討白起佐軍威劍決浮雲氣弓彎明月輝
馬行邊草綠旌捲曙霜飛抗手凜相顧寒風生鐵衣
至鴨欄驛上白馬磯贈裴侍御

側壘萬古石橫為白馬磯亂流若電轉舉棹揚珠輝
臨驛卷緹幕升堂接綉衣情親不避馬為我解霜威

感遇四首其二

可嘆東籬菊莖踈葉且微雖言異蘭蕙亦自有芳菲
未泛盈樽酒徒沾清露輝當榮君不採飄落欲何依

觀獵

太守耀清威乘間弄晚暉江沙橫獵騎山火遶行圍
箭逐雲鴻落鷹隨月兔飛不知白日暮歡賞夜方歸

宮中行樂詞八首其一

小小生金屋盈盈在紫微山花插寶髻石竹繡羅衣
每出深宮裏常隨步輦歸只愁歌舞散化作綵雲飛

同前其七

寒雪梅中盡春風柳上歸宮鶯嬌欲醉簷燕語還飛
遲日明歌席新花豔舞衣晚來移綵仗行樂泥光輝
溫泉侍從歸逢故人

漢帝長楊苑誇胡羽獵歸子雲叨侍從獻賦有光輝
激賞搖天筆承恩賜御衣逢君奏明主他日共翻飛
江上寄巴東故人

漢水波浪遠巫山雲雨飛東風吹客夢西落此中時
覺後思白帝佳人與我違瞿塘饒賈客音信莫令稀

杜集

秦州雜詩

二十首
其六

城上胡笳奏山邊漢節歸防河赴滄海奉詔發金徽
士苦形骸黑林疎鳥獸稀那堪往來成恨解鄴城圍

同前

其十八

地僻秋將盡山高客未歸塞雲多斷續邊日少光輝
鼙鼓烽常報傳聞檄屢飛西戎外甥國何得近天威

即事

聞道花門破和親事却非人憐漢公主生得渡河歸
秋思拋雲髻腰支贖寶衣群兇猶索戰回首意多違

歸燕

不獨避霜雪其如儔侶稀四時無失序八月自知歸
春色豈相訪衆雛還識機故巢儻未毀會傍主人飛

螢火

幸因腐草出敢近太陽飛未足臨書卷時能點客衣
隨風隔幔小帶雨傍林微十月清霜重飄零何處歸

秋笛

清商欲盡奏奏苦血霑衣他日傷心極征人白骨歸
相逢恐恨過故作發聲微不見秋雲動悲風稍稍飛

寒食

寒食江村路風花高下飛汀烟輕冉冉竹日靜暉暉
田父要皆去鄰家問不違地偏相識盡鷄犬亦忘歸

范二員外邀吳十侍御郁特枉駕闕展待
聊寄此作

暫往比鄰去空聞二妙歸幽棲誠簡畧衰白已光輝

重題鄭氏東亭

野外貧家遠村中好客稀論文或不愧重肯款柴扉
華亭入翠微秋日亂清輝崩石欹山樹清漣曳水衣
紫鱗衝岸躍蒼隼護巢歸向晚尋征路殘雲傍馬飛

憶弟

二首
其二

且喜河南定不問鄴城圍百戰今誰在三年望汝歸
故園花自發春日鳥還飛斷絕人煙久東西消息稀

夜

絕岸風威動寒房燭影微嶺猿霜外宿江鳥夜深飛

獨坐親雄劍哀歌嘆短衣煙塵繞閭闔白首壯心違
九日諸人集于林

九日明朝是相要舊俗非老翁難早出賢客幸知歸
舊采黃花贖新梳白髮微謾看年少樂忍淚已沾衣

秋野

五首
其二

易識浮生理難教一物微水深魚極樂林茂鳥知歸
吾老甘貧病榮華有是非秋風吹几杖不厭北山薇
贈常贊善別
扶病送君發自憐猶不歸祗應盡客淚復作掩荆扉

江漢故人少音書從此稀往還二十載歲晚寸心違

月圓

孤月當樓滿寒江動夜扉委波金不定照席綺逾依
未缺空山靜高懸列宿稀故園松桂發萬里共清輝

杜日

二首
其一

九農成德業百祀發光輝報效如神在馨香舊不違
南翁巴曲醉北鴈塞聲微尚想東方朔詼諧割肉歸
遣憤

聞道花門將論功未盡歸自從收帝里誰復總戎機

蜂萬虫終懷毒雷霆可震威莫令鞭血地再濕漢臣衣
巴西聞收京闕送班司馬入京

聞道收宗廟鳴銜自陝歸傾都看黃屋正殿引朱衣
劔外春天遠巴西勅使稀念君經世亂匹馬向王畿

警言急

才名舊楚將妙畧擁兵機玉壘雖傳檄松州會解圍
和親知計拙公主漫無歸青海今誰得西戎實飽飛
陪王漢州留杜綿州泛房公西湖
舊相思追後春池賞不稀闕庭分未到舟楫有光輝

鼓化尊絲熟刀鳴鱗縷飛使君雙皂蓋灘淺正相依
送何侍御歸朝

舟楫諸侯餞車輿使者歸山花相映發水鳥自孤飛
春日垂雙髮天隅把繡衣故人從此去寥落寸心違
宴胡侍御書堂

江湖春欲暮墻宇日猶微閭閻書籍滿輕輕花絮飛
翰林名有素墨客興無違今夜文星動吾儕醉不歸

歸鴈二首其一

萬里衡陽鴈今年又北歸雙雙瞻客上一一背人飛

雲裏相呼疾沙邊自宿稀繫書無浪語愁寂故山薇

夜其二

城郭悲笳暮村墟過翼稀甲兵年數久賦歛夜深歸
暗樹依岩落明河繞塞微斗斜人更望月細鵲休飛

雨其四

物色歲將晏天隅人未歸朔風鳴浙浙寒雨下霏霏
多病久加飯衰容新授衣時危覺凋喪故舊短書稀

韓集

梁國惠康公主挽歌其二

秦地吹簫女湘波鼓瑟妃佩蘭初應夢奔月竟淪輝
夫族迎魂去官官會葬歸從今沁園草無復更芳菲

寒食直歸遇雨

寒食時看度春遊事已違風光連日直陰雨半朝歸
不見紅毬上那論綵索飛惟將新賜火向曙著朝衣

送李六協律歸荆南

早日羈遊所春風送客歸柳花還漠漠江燕正飛飛
歌舞知誰在賓僚逐使非宋亭池水綠莫忘蹋芳菲

雨中寄張博士籍侯主簿喜

放朝還不報半路蹋泥歸雨慣曾無節雷頻自失威
見墻生菌偏憂麥作蛾飛歲晚偏蕭索誰當救晉饑
五言排律

始音

還赴蜀中貽示京邑遊好

盧照隣

禦宿花初滿章臺柳向飛如何正此日還望昔多違
悵別風期阻將垂雲會稀歛衽辭丹闕縣旗陟翠微
野禽喧戍鼓春草變征衣回顧長安道關山起夕霏

正音

酬蘇員外味玄夏晚寓直省中見贈

沈佺期

並命登仙閣通宵直禮闈大官供宿膳侍史護朝衣
捲幔天河入開窓月露微小池殘暑退高樹早涼歸
冠劍無時釋軒車待漏飛明朝題漢柱三署有光輝

正聲

贈蘇味道

杜審言

北地寒應苦南庭戍不歸邊聲亂羌笛朔吹捲戎衣
雨雪關山暗風霜草木稀胡兵戰欲盡漢卒尚重圍

雲靜妖星落，秋高塞馬肥。
據鞍雄劍動，搖筆羽書飛。
輿駕還京邑，朋遊滿帝畿。
方期來獻凱，歌舞共春暉。
奉和幸望春宮送朔方大總管張亶

李义

邊郊草具腓，河塞有兵機。
上宰調梅寄，元戎細柳威。
虎貔東道出，鷹隼北庭飛。
玉匣謀中野，金輿下太微。
投醪銜酌餞，緝袞事征衣。
勿謂公孫老，行聞獻凱歸。
宿嚴維宅送包七

皇甫冉

江湖同避地，分手自依依。
盡室今為客，經冬空念歸。
歲儲無別墅，寒服羨隣機。
草色村橋晚，蟬聲江樹稀。
夜涼宜共醉，時難惜相違。
何事隨陽侶，汀洲忽背飛。

類編

送李賓客荆南迎親

岑參

迎親辭望苑，恩詔下儲闈。
昨見雙魚去，今看駟馬歸。
驛帆湘水闊，客舍楚山稀。
手把黃香扇，身披萊子衣。
鵲隨金印喜，烏傍板輿飛。
勝作東征賦，還家滿路輝。

河嶽英靈

送祖詠

盧象

田家宜伏臘歲晏子言歸石路雪初下荒村鷄共飛
東原多烟火北澗隱寒輝滿酌野人酒倦聞隣女機
胡為困樵採幾日罷朝衣

杜集

重經昭陵

草昧英雄起謳歌曆數歸風塵三尺劍社稷一戎衣
翼亮貞文德丕承哉武威聖圖天廣大宗祀日光輝
陵寢盤空曲熊羆守翠微再窺松柏路還見五雲飛

送盧侍御護韋尚書靈視歸上都

四韻

素幙渡江遠朱幡登陸微悲鳴駟馬頤失涕萬人揮
叅佐哭辭畢門闌誰送歸從公伏事久之子俊才稀
長路更執紼此心猶倒衣感恩義不小懷舊禮無違
墓待龍驤詔臺迎獬豸威深衷見士則雅論在兵機
戎狄乘妖氣塵沙落禁闈往年朝謁斷他日掃除非
但促銅壺箭休添玉帳旂動詢黃閣老肯慮白登圍
萬姓瘡痍合群克嗜慾肥刺規多諫諍端拱自光輝
儉約前王體風流後代稀對駁期特達衰朽再芳菲
空裏愁書字山中疾採薇撥杯邀忽罷抱被宿何依

雅音會編 卷三
眼冷看征蓋兒扶立釣磯清霜洞庭葉故就別時飛

傷秋

林僻來人少山長去鳥微高秋收畫扇久客掩柴扉
懶慢頭時櫛艱難帶減圍將軍思汗馬天子尚戎衣
白蔣風颯脆殷檉曉夜稀何年減豺虎似有故園歸

傷春

五首
其三

日月還相闔星辰屢合圍不成誅執法焉得變危機
大角纏兵氣勾陳出帝畿烟塵昏御道耆舊把天衣
行在諸軍闕來朝大將稀賢多隱屠釣王肯載同歸

夜宿西閣曉呈元二十一曹長

城暗更籌急樓高雨雪微稍通綃幙霽遠帶玉繩稀
門鵲晨光起檣烏宿處飛寒江流甚細有意待人歸

登舟將適漢陽

春宅棄汝去秋帆催客歸庭蔬尚在眼浦浪已吹衣
生理飄蕩拙有心遲暮遠中原戎馬盛遠道素書稀
塞鴈與時集檣烏終歲飛鹿門自此往永息漢陰機

七言絕句

正音

明妃詞二首其一

儲光羲

日暮驚沙亂雪飛
傍人相勸易羅衣
強來前殿看歌舞
共待單于夜獵歸

觀獵

王昌齡

角鷹初下秋草稀
鉄驄拋鞚去如飛
少年獵得平原兔
馬後橫捎意氣歸

送客還幽州

李益

惆悵秦城送獨歸
薊門烟樹遠依依
秋來莫射南來鴈
縱遣乘春更北飛

山禽

張籍

山禽毛如白練帶
栖我庭前栗樹枝
獼猴半夜來取栗
一雙中林向月飛

訪隱者不遇

李商隱

城郭休過識者稀
哀猿啼處有柴扉
滄江白石漁樵路
日暮歸來雨滿衣

齊安郡後池

杜牧

菱透浮萍綠錦池
夏鴈千轉弄薔薇
盡日無人看微雨
鴛鴦相對浴紅衣

漢江

溶溶漾漾白鷗飛
綠靜春深好染衣
南去北來人自老
夕陽長送釣船歸

早發破訥沙

李益

破訥沙頭鴈正飛
鷓鴣泉上戰初歸
平明日出東南地
滿積寒光生鐵衣

遺響

塞下曲

其二首

張仲素

陰磧茫茫塞草腓
桔槔原上暮煙飛
交河北望天連

海蘇武曾將漢節歸

秋閨思

碧窓斜月藹深輝
愁聽寒蟬淚濕衣
夢裏分明見閨塞
不知何處向金微

李衛公

杜牧

絳紗弟子音塵絕
鸞鏡佳人舊會稀
今日致身歌舞地
木綿花發鷓鴣飛

公子行

雍陶

公子風流輕錦綉
新裁白苧作春衣
金鞭留當誰家

酒拂柳穿花信馬蹄

長信宮

孟遲

君恩已盡欲何歸猶有殘香在舞衣自恨身輕不如
燕春來還繞御簾飛

閨情

山上有山歸不得湘江暮雨鷓鴣飛靡蕪亦是王孫
草莫送春香入客衣

君不來

方干

遠路東西欲問誰寒來無處寄寒衣去時初種庭前

樹樹已勝巢人未歸

社日

王駕

鵝湖山下稻梁肥豚柵鷄樹半掩扉桑柘影斜春社
散家家扶得醉人歸

靈岩寺

趙嘏

館娃宮畔千年寺水濶雲多客到稀聞說春來倍惆
悵百花深處一僧歸

三體

香山館聽子規

竇常

楚塞餘春聽漸稀
斷猿今夕讓沾衣
雲埋老樹空山裏
彷彿千聲一度飛

閩鄉卜居

吳融

六載抽毫侍禁闈
可堪衰病決然歸
五陵年少如相問
阿對泉頭一布衣

逢友人之上都

僧法振

玉帛徵賢楚客稀
猿啼相送武陵歸
潮頭望入堯花去
一片春帆帶雨飛

選唐

暮夜歸故山草堂

錢起

谷口春殘黃鳥稀
辛夷花盡杏花飛
始憐幽竹山窓下
不改清陰待我歸

別雨溪

李涉

如雲不厭蒼梧遠
似鴈逢春又北飛
惟有隱山溪上月
年年相望兩依依

正聲

憶故園

顧况

惆悵名山人復稀
杜鵑啼處淚沾衣
故園此去千餘

里春夢猶能夜夜歸

送盧起居

武元衡

相如擁傳有光輝何事闌干淚濕衣舊府東山餘妓
在重將歌舞送君歸

宮詞

新鷹初放兔猶肥白日君王在內稀薄暮千門臨欲
鎖紅粧飛騎向前歸

類編

過上人蘭若

孟浩然

山頭禪室掛僧衣窗外無人越鳥飛黃昏半在下山
去却聽松聲照翠微

李集

陪族叔刑部侍郎曄及中書賈舍人至遊

洞庭

五首
其四

洞庭湖西秋月輝瀟湘江北早鴻飛醉客滿船歌白
紵不知霜露入秋衣

越中覽古

越王勾踐破吳歸義士還家盡錦衣宮女如花滿春

殿只今惟有鷓鴣啼

別內赴徵

出門妻子強牽衣問我西行幾日歸歸時儻佩黃金印莫學蘇秦不下機

從軍行

百戰沙場碎鐵衣城南已合數重圍突營射殺呼延將獨領殘兵千騎歸

杜集

絕句

三首其三

楸樹馨香倚釣磯斬新花蕊未應飛不如醉裏風吹盡可忍醒時雨打稀

韓集

鎮州初歸

別來楊柳街頭樹擺弄春風只欲飛還有小園桃李在留花不發待郎歸

柳口又贈

二首其一

山作劍攢江瀉鏡扁舟斗轉疾如飛回頭笑向張公子終日思歸此日歸

晚春

草木知春不久歸，百般紅紫鬪芳菲。
楊花榆莢無才思，惟解漫天作雪飛。

落花

已分將身著地飛，那羞踐蹋損光輝。
無端又被春風誤，吹落西家不得歸。

宿神龜招李二十八馮十七

荒山野水照斜暉，啄雪寒鴉趁始飛。
夜宿驛亭愁不睡，幸來相就蓋征衣。

奉使鎮州行次承天行營奉酬裴司空

竄逐三年海上歸，逢公復此着征衣。
旋吟佳句還鞭馬，恨不身先去鳥飛。

七言律詩

正音

酬郭給事

王維

洞門高閣藹餘輝，奕李陰陰柳絮飛。
禁裏踈鐘官舍晚，省中啼鳥吏人稀。
晨搖玉佩趨金殿，夕奉天書拜瑣闥。
強欲從君無那老，將因卧病解朝衣。

和祠部王員外雪後早朝即事

岑參

長安雪後似春歸，積素凝華連曙暉。
色借玉珂迷曉騎，光添銀燭晃朝衣。
西山落月臨天仗，北闕晴雲捧禁闈。
聞道仙郎歌白雪，由來此曲和人稀。

宿瑩公禪房聞梵

李頎

花宮仙梵遠微微，月隱高城鐘漏稀。
夜動霜林驚落葉，曉聞天籟發清機。
蕭條已入寒空靜，颯沓仍隨秋雨飛。
始覺浮生無住著，頓令心地欲歸依。

同溫丹徒登高萬歲樓

皇甫冉

高樓獨上思依依，極浦遙山合翠微。
江客不堪頻北望，塞鴻何事復南飛。
丹陽古渡寒烟積，瓜步空洲遠樹稀。
聞道王師猶轉戰，誰能談笑解重圍。

送陸澧倉曹西上

劉長卿

長安此去欲何依，先達誰當薦陸機。
日下鳳翔雙闕迥，雪中人去二陵稀。
舟從故里難移棹，家在寒塘獨掩扉。
臨水自傷流落久，贈君空有淚沾衣。

送皇甫曾赴工部

東遊久與故人違西去荒涼舊路微秋草不生三徑
處行人獨向五陵歸離心日遠如流水回首川長共
落暉楚客豈勞傷此別滄江欲暮自沾衣

送柳使君赴袁州

宜陽出守新恩至京口因家始願違五柳閉門高士
去三苗按節遠人歸月明江路聞猿斷花暗山城見
吏稀惟有郡齋窓裏岫朝朝空對謝玄暉

青谿口送人歸岳州

洞庭何處鴈南飛江蒹蒼蒼客去稀帆帶夕陽千里
沒天連秋水一人歸黃花裛露開江岸白鳥啣魚上
釣磯岐路相逢無可贈老來空有淚沾衣

酌李端校書見贈

司空曙

綠槐垂穗乳鳥飛忽憶山中獨未歸青鏡流年看髮
變白雲芳草與心違乍逢酒客春遊慣久別林僧夜
坐稀昨日聞君到城闕莫將簪弁勝荷衣

遺響

九月齊山登高

杜牧

江涵秋影鴈初飛與客携壺上翠微塵世難逢開口

笑菊花須插滿頭歸但將醕酌酬佳節不用登臨怨
落暉古往今來只如此牛山何必淚沾衣

漁父

張志和

八月九月蘆花飛南谿老人垂釣歸秋山入簾翠滴
滴野艇倚檻雲依依却把漁竿尋小徑閑梳鶴髮對
斜暉翻嫌四皓曾多事出為儲皇定是非

三體

與僧話舊

劉滄

巾烏同時下翠微舊遊因話事多違南朝古寺幾僧

在西嶺空林惟鳥歸莎逐晚烟凝竹塢石池春水染
苔衣此時相見又相別即是關河朔鴈飛

送崔約下第歸揚州

姚合

滿座詩人吟送酒離城此會亦應稀春風下第時稱
屈秋卷呈親自束歸日晚山花當馬落天陰水鳥傍
船飛江邊道路多苔蘚塵土無由得上衣

晚自東郭留一二遊侶

許渾

鄉心迢遞宦情微吏散尋幽競落暉林下草腥巢鷺
宿洞前雲濕雨龍歸鐘隨野艇回孤棹鼓絕山城掩

半扉今夜西齋好風月一瓢春酒莫相違

宿山寺

項斯

栗葉重重覆翠微
黃昏溪上語人稀
月明古寺客初到
風度閑門僧未歸
山果經霜多自落
水螢穿竹不停飛
中宵能得幾時睡
又被鐘聲催著衣

正聲

奉和春初幸太平公主南莊應制

沈佺期

主家山第早春歸
御輦春遊繞翠微
買地鋪金曾作埽
尋河取石舊支機
雲間樹色千花滿
竹裏泉聲百道飛
自有神僊鳴鳳曲
併將歌舞報恩輝

西掖省即事

岑參

西掖重雲開曙暉
北山疎雨點朝衣
千門柳色連青瑣
三殿花香入紫微
平明端笏陪鸞列
薄暮垂鞭信馬歸
官拙自悲頭盡白
不如岩下偃荆扉

送錙評事赴廣州使幕

韓翃

征南官屬似君稀
才子當今錙孝威
蠻府參軍趨傳舍
交州刺史拜行衣
前臨漲海無人過
却望衡陽少

鴈飛為報蒼梧雲影道明年早送客帆歸

冬送鑒供奉歸蜀寧親

釋靈澈

林間出定戀庭闈聖主恩深暫許歸雙樹欲辭金錫
冷四花猶向玉堦飛梁山拂漢分清境蜀雪和煙惹
翠微此去不須求綵服紫衣全勝老菜衣

鼓吹

卧病

許渾

寒窓燈盡月斜暉珮馬朝天獨掩扉清露已凋秦甸
柳白雲應長越山薇病中送客難為別夢裏還家不

當歸唯有寄書書未得卧聞燕鴈向南飛

題衛將軍廟

武軍関下護龍旗挾槊彎弧馬上飛漢業未興王霸
在秦軍纔散魯連歸墳穿大澤埋金劍廟枕長流掛
鐵衣歆奠忠魂何處問葦花楓葉雨霏霏

村舍

自前方青篲織雨衣南村煙火是柴扉山妻早報蒸梨
熟童子遙迎種豆歸魚下碧潭當鏡躍鳥還青嶂拂
屏飛花時未免人來往欲買嚴光舊釣磯

獵騎

薛逢

兵印長封入衛稀，碧空雲盡早霜微。
涇川木落鵬初下，渭曲禾收兔正肥。
陌上管絃清似語，草頭弓馬疾如飛。
豈知萬里黃雲戍，血迸金瘡卧鐵衣。

避地寒食

韓握

避地淹留已自悲，况逢寒食欲沾衣。
殘春孤館人愁坐，斜日空園花亂飛。
路遠漸憂知己薄，時危又與賞心違。
一名所繫無窮事，爭敢當年便息機。

漢武帝思李夫人

宋邕

惆悵朱顏不復歸，晚秋黃葉滿天飛。
迎風細荇傳香粉，隔水殘霞見畫衣。
白玉帳寒鴛夢絕，紫陽宮遠鴈書稀。
夜深池上蘭橈歇，斷續歌聲接太微。

曲江春望懷江南故人

趙嘏

杜若洲邊人未歸，水寒烟暖想柴扉。
故園何處風吹柳，新鴈南來雪滿衣。
目極思隨原草遍，浪高書到海門稀。
此時愁望情多少，萬里春流繞釣磯。

寒食新豐別故人

一百五日家未歸，新豐鷄犬獨依依。
滿樓春色傍人

醉半夜雨聲前計非繚繞溝塍含景晚荒涼樹石向
川微東風吹淚對花落顛顛故交相見稀

東歸

羅鄴

日日惟憂行役遲東歸可是有家歸却緣桂玉無門
住不笑山川去路非秦樹夢愁春鳥弄吳江釣憶錦
鱗肥苑天杏豔清明近惆悵當年意盡違

題靈臺縣東山主人

李嘉祐

處處征胡人漸稀山村寥落暮烟微門臨蒼莽經年
閉身逐嫖姚幾日歸貧妻白髮輸殘稅餘寇黃河未
解園天子如今能用武只應歲晚息兵機

訪遇真觀趙尊師不遇

姚鵠

羽客朝元晝掩扉林中一徑雪中微松陰滿院鶴相
對山色入樓人未歸盡日獨思風馭返寥天幾望野
雲飛憑高日斷無消息自醉自吟愁落暉

閨情代

杜牧

梧桐葉落鴈初歸迢遞無因寄遠衣月照石泉金點
冷鳳酣蕭管玉聲微佳人力杵秋風外蕩子從征夢
寐稀遙望戍樓天欲曉滿城鼙鼓白雲飛

送葉秀才

王初

快騎瓊瓏刻玉羈河梁返照上征衣層冰春近蟠龍
起九澤雲閑獨鶴飛行想北山清夢斷重遊西洛故
人稀漢庭狗監深知已有日前驅負弩歸

即事

吳融

抵鵲山前寄掩扉便堪終老脫朝衣曉窺青鏡千峯
入暮倚長松獨鶴歸雲裏引來泉脉細雨中移得藥
苗肥何須一筋鱸魚膾始掛孤帆問釣磯

對雪

二首其二

李商隱

寒氣先侵玉女扉清光旋透省郎闈梅花大庾嶺頭
發柳絮章臺街裏飛欲舞定隨曹植馬有情應濕謝
莊衣龍山萬里無多遠留待行人三月歸

聖女祠

松篁臺殿蕙香帟龍護瑤窓鳳掩扉無質易迷三里
路不寒長著五銖衣人間豈有崔羅什天上應無劉
武威寄問釵頭雙白燕每朝珠館幾時歸

寄竇尚書

羅隱

往年西謁謝玄暉尊酒留連醉始歸曲檻柳濃鶯未

老小園花煖蝶初飛噴香瑞獸金三尺舞雪佳人玉
一園今日亂離尋不得滿簑風雨釣魚磯

田家即事

權德輿

閑卧藜床對落暉倏然便覺世情非漠漠稻花資旅
食青青荷葉製儒衣山僧相訪期中飯漁父同遊或
夜歸待學尚平婚嫁畢渚烟溪月共忘機

次韻和朱况雨中之作

胡宿

蒼野迷雲黯不歸遠風吹雨入巖扉石牀潤極琴絲
緩水閣寒多酒力微夕夢將成還滴滴春心欲斷正
霏霏憂花惜月長如此爭得東陽病骨肥

夜歸華山因寄幕府蘇廣文

山村寥落野人稀竹裏衡門掩翠微溪渡夜隨明月
入亭臯春伴白雲飛嵇康懶慢仍耽酒范蠡逋逃久
拂衣河畔數鷗閑不起只應知我已忘機

寄閣記室

譚用之

織錦歌城下翠微豈勞西去問稽機未開水府珠先
見不掘豐城劍自輝鰲逐玉蟾攀桂上馬隨青帝踏
花歸相逢半是雲霄客應笑歌牛一布衣

渭城春晚

秦樹朦朧春色微，香風煙暖樹依依。
邊城夜靜月初上，芳草路長人未歸。
折柳且堪吟晚檻，弄花何處醉殘暉。
釣鄉千里斷消息，滿目碧雲空自飛。

春日

張泌

忽覺東風景漸遲，野梅山杏暗芳菲。
落星樓上吹殘角，偃月營中挂夕暉。
旅夢亂隨蝴蝶散，離魂潛逐杜鵑飛。
紅塵望斷長安陌，芳草王孫暮不歸。

鴛鴦

崔珣

翠鬣紅毛舞夕暉，水禽情似此禽稀。
暫分煙島猶回首，只度寒塘亦共飛。
映霧盡迷珠殿瓦，逐梭齊上玉人機。
採蓮無限蘭橈女，笑指中流羨爾歸。

荆門道懷古

劉禹錫

南國山川舊帝畿，宋臺梁館尚依稀。
馬嘶古樹行人歇，麥秀空城野雉飛。
風吹落葉填宮井，火入荒陵化寶衣。
徒使詞臣庾開府，咸陽終日苦思歸。

東嶽張鍊師

東嶽真人張鍊師，高情雅淡世間稀。
堪為烈女書青

簡外事元君住翠微金縷機中拋錦字玉清壇上看
霓衣雲衢不用吹簫伴祇擬乘鸞獨自歸

祇命南海至廬陵逢表兄軍倅奉使淮海

別後却寄

許渾

廬橘花香拂釣磯佳人猶舞越羅衣三洲水淺魚來
少五嶺山高鴈到稀客路晚依紅樹宿鄉關晴望白
雲歸交親不問征南史一夜風帆去似飛

長安月夜與友人話故山

趙嘏

宅邊秋水侵苔磯日日持竿去不歸楊柳風多潮未
落蕪葭霜在鴈初飛重嘶足馬吟紅葉却聽疎鐘憶
翠微今夜秦城滿樓月故人相見一沾衣

西塞山泊漁家

皮日休

白綸巾下髮如絲靜倚楓根坐釣磯中婦桑村桃葉
去小兒沙市買簑歸雨來蓴菜流船滑春後鱸魚墜
釣肥西塞山前終日客隔波相羨盡依依

送圓載上人歸日本國

講殿談餘着賜衣柳帆却返舊禪扉具多紙上經文
動如意瓶中佛爪飛颺母影邊持戒宿波神宮裏受

齋歸家山到日將何日白象新秋十二圍

詩選

送客還江東

韓翃

不妨高卧順流歸五兩行看掃翠微
鼯鼠夜喧孤枕近鷓鴣曉避客船飛
一壺先醉苑花簾百和初薰
苧布衣君到新林江口泊吟詩應賞謝玄暉

送韋信愛子歸覲

錢起

離舟解纜對斜暉春水東流鴈北飛
才子學詩趨露冕棠花含笑待班衣
稍聞江樹啼猿近轉覺山林過客稀
借問還珠盈合浦何如鯉也入庭闈

賀陳雄郎中拜本府少尹兼侍御史獻上

侍中因呈同院諸公

盧綸

金印垂鞭白馬肥不同跡廣老方歸
三千士裏文章伯四十年來錦綉衣
節比青松當澗直心隨黃雀繞簷飛
山中賀者唯爭路不識傳呼獬豸威

賀李觀察禱河神降雨

耿湜

質明齋祭北風微騶馭千群擁廟扉
玉帛纔敷雲澹澹笙鏞未撤雨霏霏
道邊五稼添膏長河上雙旌帶

濕歸若出敬亭山下作何人敢和謝玄暉

賀知章入道

姚鵠

若非克運及垂衣肯許巢由脫俗機太液始同黃鶴
下仙鄉已駕白雲歸還披舊褐辭金殿却捧玄珠向
翠微羈束慚無仙藥分隨君空有夢魂飛

獻薛僕射

秦系

由來那敢議輕微散髮行歌自采薇逋客未能忘野
興辟書翻遣脫荷衣山中稚子空相笑池上群鷗盡
欲飛更乞大賢容小隱益看愚谷有光輝

鄠杜舊居

韋莊

再到山陽事事非谷雲溪鳥尚相依阮咸貧去田園
盡向秀歸來父老稀秋雨幾家紅稻熟野塘何處錦
鱗肥年年為向東堂策長是蘆花別釣磯

龍池篇

沈佺期

龍池躍龍龍已飛龍德先天天不遠池開天漢分黃
道龍向天門入紫微邸第樓臺多氣色君王鳧鴈有
光輝為報寰中百川水來朝此地莫東歸

題裴晉公林亭

溫庭筠

謝傳林亭暑氣微山丘零落秘音微東山終為蒼生
起南浦虛言白首歸池鳳已傳春水浴渚禽猶帶夕
陽飛悠然到此忘情處一日何妨有萬機

揚州開元寺作

羅隱

滿檻山川漾落暉檻前人事去如飛雲中鷄犬劉安
過月下笙歌煬帝歸江撼海門帆散出地吞淮口樹
相依紅樓翠幕知多少長向東風有是非

降虜

趙嘏

廣武溪頭降虜稀一聲寒角怨金微河湟不在春風
地歌舞空裁雪夜衣鉄馬半嘶邊草去狼烟高映塞
鴻飛楊雄尚白相如吃今日何人從獵歸

光嶽英華

奉和太平公主南莊應制

李邕

傳聞銀漢支機石復見金輿出紫微織女橋邊烏鵲
起仙人樓上鳳凰飛流風入座飄歌扇瀑水當階濺
舞衣今日還同犯牛斗乘槎共泛海潮歸

類編

行縣至浮查寺

羅炯

三十年前此布衣鹿鳴西上虎符歸行時宿從光前
事到處松杉長舊園野老競遮官道拜沙鷗遙避隼
旗飛春風一宿琉璃地自是泉聲愜素機

題上皇觀

薛逢

狂寇窮兵犯帝畿上皇曾此振戎衣門前衛士傳清
壑堦下奚官掃翠微雲駐壽宮三洞啓日廻仙仗六
龍歸當時丹鳳啣書處老栢蒼蒼已合圍

李集

贈郭將軍

將軍少年出武威入掌銀臺護紫微平明拂劍朝天
去薄暮垂鞭醉酒歸愛子臨風吹玉笛美人向月舞
羅衣疇昔雄豪如夢裏相逢且欲醉春暉

送賀監歸四明應制

久辭榮祿遂初衣曾向長生說息機真訣自從茅氏
得恩波應阻洞庭歸瑤臺含霧星辰滿仙嶠浮空島
嶼微借問欲栖珠樹鶴何年却向帝城飛

題雍丘崔明府丹竈

美人為政本忘機服藥求仙事不違葉縣已泥丹竈

畢瀛洲當洋赤松歸先師有訣神將助大聖無心火
自飛九轉但能生羽翼雙鳧忽去定何依

杜集

曲江對酒

苑外江頭坐不歸水精宮殿轉霏微
苑花細逐楊花落黃鳥時兼白鳥飛
縱飲又拚人共棄嬾朝真與世
相違吏情更覺滄洲遠老大悲傷未拂衣

送韓十四江東省覲

兵戈不見老萊衣歎息人間萬事非
我已無家尋弟妹君今何處訪庭闈
黃牛峽靜灘聲轉白馬江寒樹影稀
此別應須各努力故鄉猶恐未同歸

秋興八首其三

千家山郭靜朝暉日日江樓坐翠微
信宿漁人還汎汎清秋燕子故飛飛
匡衡抗疏功名薄劉向傳經心事違
同學少年多不賤五陵衣馬自輕肥

曲江二首其二

朝回日日典春衣每日江頭盡醉歸
酒債尋常行處有人生七十古來稀
穿花蛺蝶深深見點水蜻蜓款

欵飛傳語風光共流轉暫時相賞莫相違

秋風二首
其二

秋風淅淅吹我衣東流之外西日微天清小城搗練
急石古細路行人稀不知明月為誰好早晚孤帆他
夜歸會將白髮倚庭樹故園池臺今是非

黃草

黃草峽西船不歸赤甲山下行人稀秦中驛使無消
息蜀道兵戈有是非萬里秋風吹錦水誰家別泪濕
羅衣莫愁劍閣終堪據聞道松州已被圍

十二月一日
其三

即看燕子入山扉豈有黃鸝歷翠微短短莢花臨水
岸輕輕柳絮點人衣春來準擬開懷又老去親知見
面稀他日一盃難強進重嗟筋力故山違

雨不絕

鳴雨既過漸細微映空搖颺如絲飛階前短草泥不
亂院裏長條風乍稀舞石旋應將乳子行雲莫自濕
仙衣眼邊江舸何匆促未得安流逆浪歸

將赴成都草堂途中有作先寄嚴鄭公

錦官城西生事微，烏皮几在還思歸。昔去為憂亂兵入，今來已恐隣人非。側身天地更懷古，回首風塵甘息機。共說搃戎雲鳥陣，不妨遊子芰荷衣。

見螢火

巫山秋夜螢火飛，簾竦巧入坐人衣。忽驚屋裏琴書冷，復亂簷前星宿稀。却繞井欄添箇箇，偶經花蕊弄輝輝。滄江白髮愁看汝，來歲知今歸未歸。

閬水歌

嘉陵江色何所似，石黛碧玉相因依。正憐日破浪花出，更復春從沙際歸。巴童蕩槳小歌側，過水鷄銜魚來去。飛閣中勝事，可腸斷閬州城南天下稀。

六魚

五言絕句

正音

班婕妤

其二首
其一

王維

宮殿生秋草，君王恩幸疎。那堪聞鳳吹，門外度金輿。

遺響

羅嘖曲

五首
其五

劉采春

那年離別日只道往桐廬桐廬人不見今得廣州書

杜集

復愁十二首
其十二

病減詩仍拙吟多意有餘莫看江揔老猶被賞時魚

韓集

新亭

湖上新亭好公來日出初水紋浮枕簟瓦影蔭龜魚

五言律詩

始音

郊興

王勃

空園歌獨酌春日賦閑居澤蘭侵小徑河柳覆長渠
雨去花光濕風歸葉影疎山人不惜醉唯畏淶尊虛

正音

歸終南山

孟浩然

北闕休上書南山歸弊廬不才明主棄多病故人疎
白髮催年老青陽逼歲除永懷愁不寐松月夜窓虛

宿武陽川

川暗夕陽盡孤舟泊岸初嶺猿相叫嘯潭影似空虛

就枕滅明燭扣舷聞夜漁鷄鳴問何處人物似秦餘

遺響

送朱可久歸越中

賈島

石頭城下泊北固暝鐘初汀鷺衝潮起船窓過月虛
吳山侵越衆隋柳入唐疎日欲供調膳辟來何府書

長信宮 二首 其一

于武陵

簾涼秋氣初長信恨何如拂黛月生指解鬟雲滿梳
一從悲畫扇幾度泣前魚坐聽南宮樂清風搖翠裾

三體

送曹同椅

司空曙

青春三十餘衆藝盡無如中散詩傳盡將軍扇續書
楚田晴下鴈江日暖多魚惆悵空相送歡遊自此疎

送王正字山寺讀書

李嘉祐

欲究先儒教還過支遁居篠堦閑聽法竹寺獨看書
向日荷新卷迎秋柳半疎風流有佳句不似帶經鋤

鄆北李生舍

李洞

圭峯秋後夜亂葉落寒墟四五自竿竹二三千卷書
雲深猿盜栗雨霽螳沾蔬只隔門前水如同萬里餘

岳州逢司空曙

李端

共有髫年故相逢萬里餘
新春兩行淚故國一封書
夏口帆初落涔陽鴈正踈
唯應執盃酒暫食漢江魚
栢梯寺懷舊僧
司空曙

雲根禪客居皆說舊吾廬
松日明金像苔龕嚮木魚
依棲應不阻名利本來踈
縱有人相問林間懶拆書

寄友人

張蠟

世道復何如東西遠索居
長疑即見面翻致久無書
甸麥深藏雉淮苔淺露魚
相思不我會明月幾盈虛

酌暢當

耿滂

同遊漆沮後已是十年餘
幾度曾相夢何時定得書
月高城影盡霜重柳條踈
且對樽中酒千般想未如

別王弘上人

嚴維

最稱弘偃少早歲草茅居
年老從僧律生知解佛書
衲衣求壤帛野飯食春蔬
章句無求斷時中學有餘

正聲

寄校書七兄

李季蘭

無事烏程縣蹉跎歲月餘
不如芸閣吏寂寞竟何如

牙音會編 卷三
遠水浮仙棹寒星伴使車因過大雷澤莫忘幾行書

類編

得嶺南故人書

盧綸

瘴海寄雙魚終宵達我居兩行燈下淚一紙嶺南書
地說炎蒸極人稱老病餘殷勤報賈誼莫共酒盃踈

尋張子顏隱居

孟浩然

白鶴青苔畔幽人有隱居堦庭空水石林壑罷樵漁
歲月青松老風霜苦竹踈覩茲懷舊業携策返吾廬

河嶽英靈

與永樂諸公泛黃河作

閻防

烟深載酒入但覺暮川虛映水見山火鳴榔聞夜漁
愛茲山水趣忽與世人踈無暇燃官燭中流有望舒

李集

送弟疑之滁求婚崔氏

與爾情不淺忘筌已得魚玉臺掛寶鏡持此意何如
坦腹東床下由來志氣踈遙知向前路擲果定盈車

送別得書字

水色南天遠舟行若在虛遷人發佳興吾子訪閑居

日落看歸鳥，潭澄羨躍魚。聖朝思質直，應降紫泥書。
詠山樽二首其一

蟠木不彫飾，且將斤斧竦。樽成山岳勢，材是棟梁餘。
外與金罍並，中涵玉醴虛。慙君垂拂拭，遂忝玳筵居。

杜集

登兗州城樓

東郡趨庭日，南樓縱目初。浮雲連海岱，平野入青徐。
孤嶂秦碑在，荒城魯殿餘。從來多古意，臨眺獨躊躇。
對雨書懷走邀許主簿

東嶽雲峯起，溶溶滿太虛。震雷翻幕燕，驟雨落河魚。
坐對賢人酒，門停長者車。相邀愧泥濘，騎馬到堦除。
重過何氏五首其一

問訊東橋竹，將軍有報書。倒衣還命駕，高枕乃吾廬。
花妥鶯捎蝶，溪喧獺趁魚。重來休沐地，真作野人居。
收京三首其一

仙仗離丹極，妖星帶玉除。須為下殿走，不可好樓居。
暫屈汾陽駕，聊飛燕將書。依然七廟畧，更與萬方初。
寄高三十五詹事

安穩高詹事兵戈久索居時來知宦達歲晚莫情疎
天上多鴻鴈池中足鯉魚相看過半百不寄一行書

除架

束薪已零落瓠葉轉蕭疎幸結白花了寧辭青蔓除
秋蟲聲不去暮雀意何如寒事今牢落人生亦有初

酌高使君相贈

古寺僧牢落空房客寓居故人供祿米鄰舍與園蔬
雙樹容聽法三車肯載書草玄吾豈敢賦或似相如
逢唐興劉主簿弟

分手開元末連年絕尺書江山且相見戎馬未安居
劍外官人冷關中驛騎疎輕舟下吳會主簿意何如

秋清

高秋蘇肺氣白髮自能梳藥餌憎加減門庭悶掃除
杖藜還客拜愛竹遣兒書十月江平穩輕舟進所如

中宵

西閣百尋餘中宵步綺疏飛星過水白落月動沙虛
擇木知幽鳥潛波想巨魚親朋滿天地兵甲少來書

灤西寒望

水色含群動朝光接太虛年但復頻悵望興遠一蕭疎
猿掛時相學鷗行炯自如瞿塘春欲至定卜灤西居

秋野五首其一

秋野日荒蕪寒江動碧虛繫舟蠻井絡卜宅楚村墟
棗熟從人打葵荒欲自鋤盤盂老夫食分減及溪魚

酌常韶州見寄

養拙江湖外朝廷記憶疎深慙長者轍重得故人書
白髮絲難理新詩錦不如雖無南過鴈看取北來魚

過客相尋

窮老真無事江山已定居地幽忘盥櫛客至罷琴書
掛壁移筐果呼兒問煮魚時聞繫舟楫及此問吾廬

白小

白小群分命天然二寸魚細微沾水族風俗當園蔬
入肆銀花亂傾箱雪片虛生成猶拾邠盡取義何如

戲作俳諧體遣悶二首其一

異俗可吁怪斯人難並居家家養烏鬼頓頓食黃魚
舊識難為態新知已暗踈治生且耕鑿只有不闕渠

五言排律

類編

西山尋辛諤

孟浩然

漾舟乘水便因訪故人居落日晴川裏誰言獨羨魚
石潭窺洞徹沙岸歷紆餘竹嶼見垂釣茅齋聞讀書
款言忘景夕清興屬涼初回也一瓢飲賢哉常晏如

春日奉酬聖壽無疆詞

十首其四

楊巨源

雲陞臨黃道天門在碧虛大明含睿藻元氣抱宸居
戈偃征苗後詩傳宴鎬初年華富仙苑時摅滿公車
化入網緼大恩垂泮渙餘悠然萬方靜風俗揖華胥

晚秋集賢院即事寄徐薛二侍郎

常袞

穆穆上清居沉沉中秘書金鋪深內殿石甃淨寒渠
花樹臺斜倚宮烟閣半虛縹囊被錦繡翠軸卷璠瑤
墨潤冰文繭香消蠹字魚翻黃桐葉老吐白桂花初
舊德雙遊處照芳十載餘北朝榮庾薛西漢盛嚴徐
侍講親華袞徵吟步綺疏綴簾金翡翠賜硯玉蟾蜍
序秩東南遠離憂歲月除承明期重入江海意何如

酬包諫議見寄

劉長卿

卷三
五
佐郡愧頑疎殊方親里閭家貧寒未度身老歲將除
過雪山僧至依陽野客書藥陳隨遠宦梅發對幽居
落日棲鴉鳥行人遺鯉魚高文不可和空愧學相如

和崔司馬登稱心山寺

孫逖

郡府乘休日王成訪道初覺花迎步履香草籍行車
倚閣觀無際尋山盡太虛岩空迷禹跡海靜望秦餘
翡翠巢珠網鷓鴣間綺疏地靈資淨土水若護真如
寶樹誰攀折禪雲自捲舒晴分五湖勢烟合九夷居
生滅分無象窺臨已得魚嘗聞寶刀贈今日奉璫琚

李集

江夏使君叔席上贈史郎中

鳳凰丹禁裏銜出紫泥書昔放三湘去今還萬死餘
仙郎久為別客舍問何如涸轍思流水浮雲失舊居
多慙華省貴不以逐臣疎復如竹林下叨陪芳宴初
希君生羽翼一化北溟魚

秋日與張少府楚城韋公藏書高齋作

日下空亭暮城荒古跡餘地形連海盡天影落江虛
舊賞人雖隔新知樂未疎彩雲思作賦丹壁間藏書

植擁隨流葉萍開出水魚夕來秋興滿回首意何如

杜集

得家書

去憑遊客寄來為附家書今日知消息他鄉且舊居
熊兒幸無恙驥子最憐渠臨老羈孤極傷時會合踈
二毛趨帳殿一命侍鸞輿北闕妖氛滿西郊白露初
涼風新過鴈秋雨欲生魚農事空山裏眷言終荷鋤

遠懷舍弟穎觀等

陽翟空知處荆南近得書積年仍遠別多難不安居

江漢春風起冰霜昨夜除雲天猶錯莫花萼尚蕭疎
對酒都疑夢吟詩正憶渠舊時元日會鄉黨羨吾廬

秋日荆南送石首薛明府辭滿告別奉薛

尚書頌德叙懷斐然之作三十韻

南征為客久西候別君初歲滿歸鳧舄秋來把鴈書
荆門留美化姜被就離居聞道和親入垂名報國餘
連枝不日並八座幾時除徃者胡星孛恭惟漢網踈
風塵相頽洞天地一丘墟殿瓦鴛鴦拆官簾翡翠虛
鈎陳摧徼道搶鼎失儲胥文物陪巡狩親賢病拮据

公時呵猥偷首唱却鯨魚勢愜宗蕭相材非一范睢
屍填太行道血走浚儀渠淦口師仍會函閔憤已攄
紫微臨大角皇極正乘輿賞後頻峨冕殊私再直廬
豈惟高衛霍曾是接應徐降集翻翔鳳追攀絕衆徂
侍臣雙宋玉戰策兩穰苴鑿澈勞懸鏡荒蕪已荷鋤
向來披述作重此憶吹噓白髮甘凋喪青雲亦捲舒
經綸功不朽跋步體何如應訝耽湖橘常食占野蔬
十年應藥餌萬里狎樵漁揚子淹投閣鄒生惜曳裾
但驚飛熠燿不記改蟾蜍煙雨封巫峽江淮略孟諸

湯池雖險固遼海尚填淤努力輸肝膽休煩獨起予

贈李八初書別三十韻

往時中補右扈蹕上元初反氣陵行在妖星下直廬
六龍瞻漢闕萬騎畧姚墟玄朔回天步神都憶帝車
一戎纔汗馬百姓免為魚通籍蟠螭印差肩列鳳輿
事殊迎代邸喜異賞朱虛寇盜方歸順乾坤欲晏如
不才同補袞奉詔許牽裾鸛鷺叨雲閣麒麟帶玉除
文園及病後中散舊交疎飄泊哀相見平生意有餘
風煙巫峽遠臺榭楚宮虛觸目非論故新文尚起予

清秋凋碧柳別浦落紅葉消息多旗幟經過歎里閭
戰連唇齒國軍急羽毛書幕府籌頻問山家藥正鋤
台星入朝謁使節有吹噓西屬災長弭南翁憤始攄
對敵抗士卒乾沒費倉儲勢籍兵須用功無禮忽諸
御鞍金駿裊官硯玉蟾蜍拜舞銀鈎落恩波錦帕書
此行非不濟良友昔相於去棹衣顏色汭流想疾徐
沈綿疲井白倚薄似樵漁乞米煩佳客鈔詩聽小胥
杜陵斜晚照滴水帶寒淤莫話清溪髮蕭蕭白映梳
將別巫峽贈南卿兄灤西果園四十畝

苔竹素所好萍蓬無定居遠遊長兒子幾地別林廬
雜藥紅相對他時錦不如具舟將出峽巡圃念攜鋤
正月喧鴛未茲辰放鷁初雪籬梅可折風榭柳微舒
託贈卿家有因歌野興疎殘生逗江漢何處狎樵漁

七言絕句

正音

簇拍陸州

蓋嘉運

西去輪臺萬里餘故鄉音耗日應疎隴山鸚鵡能言
語為報閨人數寄書

玉關寄長安主簿

岑參

東去長安萬里餘，故人那惜一行書。
玉關西望腸堪斷，况復明朝是歲除。

銅魚使赴都寄親友

柳宗元

行盡關山萬里餘，到時閭井是荒墟。
附庸惟有銅魚使，此後無因寄遠書。

寒塘曲

張籍

寒塘沉沉柳葉疎，水暗人語驚棲鳥。
見舟中少年醉不起，持燭照水射遊魚。

遺響

寄蕭三十三赴歙州昏期僕客揚州早春
書寄一絕

盧仝

淮上客情殊冷落，蠻方春早客何如。
相思莫道無來使，回雁峯前好寄書。

寄令狐郎中

李商隱

嵩雲秦樹久離居，雙鯉迢迢一紙書。
休問梁園舊賓客，茂陵秋雨病相如。

閑居襟興

陳陶

一顧成周力有餘白雲閑釣五溪魚中原莫道無麟鳳自是皇家結網疎

老圃堂

薛能

邵平瓜地接吾廬穀雨乾時偶自鋤昨日春風欺不在就床吹落讀殘書

三體

秋日過員太祝林園

李涉

望水尋山二里餘竹林斜到地仙居秋光何處堪消日玄晏先生滿架書

焚書坑

章碣

竹帛煙消帝業虛關河空鎖祖龍居坑灰未冷山東亂劉項元來不讀書

江南

陸龜蒙

村邊紫豆花垂次岸上紅梨葉戰初莫怪煙中重回首酒旗青紵一行書

選唐

山中寄友人

李九齡

亂雲堆裏結茅廬已共紅塵跡漸疎若問野人生計

事窓前流水枕前書

正聲

古意

耿津

雖言千騎上頭居一世生離恨有餘葉下綺窓銀燭
冷含啼自草錦中書

杜集

解悶十二首其一

草閣柴扉星散居浪翻江黑雨飛初山禽引子哺紅
果溪女得錢番白魚

韓集

題木居士二首其二

為神詎比溝中斷遇賞還同爨下餘朽蠹不勝刀鋸
力匠人雖巧欲何如

七言律詩

正音

送王李二少府貶潭峽

高適

嗟君此別意何如駐馬銜盃問謫居巫峽啼猿數行
淚衡陽歸鴈幾封書青楓江上秋天遠白帝城邊古

木疎聖代只今多雨露暫時分手莫躊躇

寄常司直

卽士元

聞君感歎二毛初舊友相依萬里餘烽戍有時驚暫
定甲兵無處可安居客來吳地星霜久家在平陵音
信疎昨夜東風還入戶登山臨水復何如

酌張芬赦後見寄

司空曙

紫鳳朝啣五色書陽春忽布網羅除已將心變寒灰
後豈料光生腐草餘建水風煙收客淚杜陵花竹夢
郊居勞君故有詩相贈欲報瓊瑤愧不如

籌筆驛

李商隱

魚鳥猶疑畏簡書風雲長為護儲胥徒令上將揮神
筆終見降王走傳車管樂有才終不忝關張無命復
何如他年錦里經祠廟梁甫吟成恨有餘

三體

洗竹

王貞白

道院竹繁教畧洗鳴琴酌酒看扶疎不徒結實來雙
鳳且要長竿釣巨魚錦籜裁冠添散逸玉芽脩饌稱
清虛有時記得三天事自向琅玕節下書

贈蕭兵曹

許渾

廣陵堤上音離居
帆轉瀟湘萬里餘
楚澤病時無鵬鳥
越鄉歸去有鱸魚
潮生水國蒹葭響
雨過山城橘柚疎
聞說携琴兼載酒
邑人爭識馬相如

江亭秋霽

李郢

碧天涼冷鴈來疎
閑看江雲思有餘
秋館池亭荷葉後
野人籬落豆花初
無愁自得山翁術
多病能忘太史書
聞說故園香稻熟
片帆歸去就鱸魚

鼓吹

光啓四年春戊申

司空圖

亂後燒殘數架書
峯前猶自戀吾廬
忘機漸喜逢人少
覽鏡空憐待鶴疎
孤嶼池痕春浪滿
小欄花潤午晴初
酣歌自適逃名久
不必門多長者車

江邊秋夕

譚用之

千鐘紫酒薦菖蒲
松島蘭舟漱灩居
曲內橘香江客笛
字中鍾氣岳僧書
吟期汗漫驅金虎
坐約丹青跨玉魚
七色花虬一聲鶴
幾時乘輿上清虛

淮南王

胡宿

貪鑄金錢盜馮符何曾七國戒前車長生不待爐中
藥鴻寶誰收篋裏書碧井林空天影在小山人去桂
叢疎雲中鷄犬無消息麥秀漸漸徧故墟

和劉評事永樂閑居見寄

李商隱

白舍幽閑君暫居青雲器業我全疎已看諫草歸鸞
掖尚憤衡門待鶴書蓮簷碧峯關路近荷翻翠蓋水
堂虛自探典籍忘名利敵枕時驚落蠹魚

依韻奉酬李迪

高駢

柳下官資顏子居閑情入骨若為除詩成斬將奇難
敵酒熟封侯快未如只見絲綸終日降不知功業是
誰書而今共飲醇滋味消得椰榆勢力疎

寄浙西李判官

杜牧

燕臺上客意何如四五年來漸漸疎直道莫拋君子
業遭時還與故人書青雲滿眼應驕我白髮湮頭少
恨渠誰念賢哉崔大讓可憐無事不歌魚

齊安郡晚秋

柳岸風來柳漸疎使君家似野人居雲容水態還堪
賞嘯志歌懷亦自如雨暗殘燈棊散後酒醒孤枕鴈

來初可憐赤壁爭雄渡唯有箕公坐釣魚

贈南嶽馮處士

其二首

曹唐

白石溪邊自結廬風泉滿院稱幽居鳥啼深樹劔靈
藥花落閑窓看道書煙嵐晚過鹿裘濕水月夜明山
舍虛支頤冷笑緣名出終日王門強曳裾

寄淮南鄭賓書記

陸龜蒙

記室千年翰墨孤惟君才學似應徐五丁驅得神功
盡二酉搜來秘檢踈湯帝帆檣歸澤國淮王箋奏入
班書清詞醉草無因見但釣寒江半尺鱸

送李處士弋陽山居

權德輿

暫來城市意何如却憶菖陽溪上居不憚薄田輸井
稅自將佳句著州閭波翻極浦檣竿出霜落秋郊樹
影踈想到家山無俗侶逢迎只是坐藍輿

詩選

享龍池樂章應制

李乂

星分邑里四人居水游源流萬頃餘魏國君王稱象
處晉家藩邸化龍初青蒲暫似遊梁馬綠藻還疑宴
鎬魚自有神靈滋液地年年雲物史官書

送彬縣裴明府之任兼充宣慰

郎士元

白蘋楚水三湘遠芳草秦城二月初
連鴈北飛看欲盡孤舟南去意何如
渡江野老思求瘼候館郴人憶下車
別後天涯何所寄故交唯有袖中書

訪王起居不遇留贈

韓翃

雙龍闕下拜恩初天子令君注起居
載筆已齊周右史論詩更事謝中書
行聞漏滴隨金仗入對爐烟侍玉除
賀客自知來獨晚青驪不見意何如

宴曹王宅

錢起

賢王駟馬退朝初小苑三春帶雨餘
林沼葱蘢多貴氣樓臺隱映接天居
仙鷄引敵穿紅藥宮燕銜泥落綺疏
自嘆平生相識願何如今日廁應徐

類編

送于中丞使回紇

賈島

君立天驕發使車冊文字字盡金書
漸過青塚鄉山遠欲達皇情譯語初
調角寒城邊色早下霜秋磧鴈行
踈旌旗來往三千里應向途中見歲除

送徐州李從事

薛逢

曉乘征騎帶犀渠，又是都門送別初。
蓮府望高秦御史，柳營官重漢尚書。
斬蛇宅畔風烟晚，戲馬臺前草樹疎。
尺組掛身何用說，古來名利盡丘墟。

豫章江樓望西山有懷

陳陶

水護星壇列太虛，烟霞明滅上清居。
時人未識遼東鶴，吾祖曾傳寶鼎書。
終日章江催白髮，何年丹竈見紅渠。
桃源谷口春深淺，欲訪先生赤鯉魚。

送商州杜中丞赴任

權德輿

安康地里接商於，帝命專城摠賦輿。
夕拜忽辭青瑣闥，晨裝獨捧紫泥書。
深山古驛分騶騎，芳草閑雲逐隼旟。
綺皓清風千古在，因君一為謝岩居。

杜集

栢學士茅屋

碧山學士焚銀魚，白馬却走身巖居。
古人已用三冬足，年少今開萬卷餘。
晴雲滿戶團傾蓋，秋水浮堦溜決渠。
富貴必從勤苦得，男兒須讀五車書。

奉酌嚴公寄題野亭之作

拾遺曾奏數行書，懶性從來水竹居。
奉引濫騎沙苑馬，幽栖真釣錦江魚。
謝安不倦登臨廢，阮籍焉知禮法踈。
枉沐旌麾出城府，草茅蕪逕欲教鋤。

韓集

量移袁州張韶州端公以詩相賀因酌之
明時遠逐事何如，遇赦移官醉未除。
北望詎令隨塞鴈，南遷纔免葬江魚。
將經貴郡煩留客，先惠高文謝起予。
暫欲繫船韶石下，上賓虞舜整冠裾。

七言排律

杜集

寄岑嘉州參

不見故人十年餘，不道故人無素書。
願逢顏色關塞遠，豈意出守江城居。
外江三峡且相接，斗酒新詩終自踈。
謝朓每篇堪諷誦，馮唐已老聽吹噓。
泊船秋夜經春草，伏枕青楓限玉除。
眼前所寄選何物，贈子雲安雙鯉魚。

雅音會編卷之三 畢



